



NASTAVLJENO SUĐENJE POMOĆNIKU MINISTRA

Prikazan snimak na kojem Imamović uzima 10.000 KM

Novac je uzet od **SIPA-e**, označen je, fotografisan i predat Velagiću. On je dobio uputstva da primopredaja bude na otvorenom gdje nema puno ljudi, posvjedočio je Miletić

Svjedočenjem Nebojše Miletića, istražitelja Državne agencije za istrage i zaštitu (**SIPA**), jučer je u Općinskom sudu Tuzla nastavljeno suđenje Bahiru Imamoviću, pomoćniku ministra industrije, energetike i rudarstva u Vladi TK, koji se tereti za uzimanje mita od 10.000 KM kako bi završio proceduru dodjele koncesije preduzeću "Tuzla – kvarc".

"Pao" na prvoj rati

Imamović je od Velagića, za proceduru dodjele koncesije na ležištima kvarcnog pijeska, tražio da mu se u tri rate isplati dar od 30.000 KM.

Na isplati prve rate Imamović je "pao", i to na parkingu kod nekadašnjeg tržnog centra "Tuš". O tome je jučer i svjedočio Miletić. On je govorio o istražnim radnjama, te o tome na koji način je došlo do primopredaje novca u autu Velagića. Također, naveo je da su stručnjaci iz SIPE već ranije ozvučili auto i u njega postavili kamere.

-Novac je uzet od **SIPA-e**, označen je, fotografisan i predat Velagiću. On je dobio uputstva da primopredaja bude na otvorenom, i gdje nema puno ljudi. Mi smo bili u drugom vozilu. Vidjeli smo kada Imamović ula-

zi u auto i slušali smo sve šta se dešava u autu Velagića, gdje je izvršena primopredaja novca - kazao je Miletić, navodeći da su on i njegove kolege nakon izlaska iz auta uhapsili Imamovića.

Naveo je da je novac pronađen u desnom džepu uhapšenog pomoćnika ministra.

Tokom svjedočenja, Miletić je kazao da je Velagiću sugerisano da ne smije nagovarati Imamovića na krivično djelo.

S druge strane, odbrana je pokušavala da diskvalifikuje Velagića, na osnovu čije prijave je i započeo cijeli proces, navodeći da se protiv firme "Tuzla kvarc" vodi postupak pred tuzlanskim pravosuđem.

-Tužilaštvo BiH je ocijenilo da prijava Velagića nema veze sa predmetom koji se vodi protiv firme - kazao je Miletić.

I Imamović je ispitivao svjedoka. Na suđenju je rekao kako je Velagić u svojoj izjavi kazao

"da je bio u političkim centrima, da se Bahir Imamović eliminiše iz Ministarstva industrije"

Razgovori i poruke

-Ja sam trebao biti eliminiran - kazao je Imamović, čije je ispitivanje Miletića više ličilo na njegovu ispovijest i komentarisanje cijelog slučaja.

I Imamović i njegov advokat su tokom suđenja tvrdili da Velagić ne može biti tehnički

direktor firme "Tuzla kvarc", dodajući da je i tu činjenicu **SIPA** trebala imati u vidu. Tokom ročišta je u nekoliko navrata dolazilo do prepirke između tužilaca.

Nakon svjedočenja Miletića, prikazani su krucijalni snimci na kojima se vidi kako Imamović od Velagića uzima i broji 10.000 maraka u autu. On tokom desetominutnog razgovora sa Velagićem govori o njihovom ranijem


dogovoru.

-Dogovorili smo se 30.000 KM u tri dijela. Danas prva rata. Druga rata kada se dobije ugovor o koncesiji, a treća rata kada uđeš u kop - kazao je Imamović.


Također, na suđenju su prikazane fotografije hapšenja Imamovića nakon izlaska iz auta, a prikazane su i SMS poruke koje je on ranije slao i primao, te presretnuti telefonski razgovori. **S. KARIĆ**



Imamović jučer na suđenju



U sudnici prikazan snimak preuzimanja novca



Prikazane fotografije hapšenja